

摘藻堂四庫全書薈要

集部

欽定四庫全書薈要卷一萬三千一百九十三

集部

世宗憲皇帝御製文集卷十五

碑文

黃河澄清碑記

朕聞

上天孚佑生民日監在茲垂示休徵警覺有位凡欲使  
之懋德勤政無怠無荒而修省加虔用答嘉貺天人感  
應之理致不爽也我

皇考聖祖仁皇帝功德隆盛臨御久長厚澤深仁洋溢於薄海內外朕寅紹鴻圖仰承

盛烈蒙被

福蔭民物阜安數年以來嘉祥疊見乃雍正四年十有二月河道總督齊蘇勒及副總河嵇曾筠漕運總督張大有河南巡撫田文鏡山東巡撫塞楞額陝西巡撫法敏先後馳奏黃河自陝西府谷縣歷山西河南山東以至江南之桃源冰開水清湛然澄澈其在陝西山西始

見於雍正四年十有二月八日乙丑迄於雍正五年正月十三日庚子凡三十有六日其在河南山東始見於十有二月九日丙寅迄於次年正月十日丁酉凡三十有一日山東之單縣亦清於丙寅至癸酉甲戌清澈見底而是月之二十二日己卯漸復其舊凡十有四日其在江南則始於十有二月十六日癸酉迄於是月二十三日庚辰凡七日蓋其清也自上而下及其復舊則自下而上故時日之先後遠近漸次如是維時中外臣民

僉以河清為千年罕見之盛事稽諸史冊咸稱上瑞況  
橫亘三千一百餘里縣歷三旬有餘尤亘古所未睹合  
詞懇請御殿受賀至再至三朕惟上天之錫福降災猶  
人君之用賞行罰感召之機分於敬肆一念甫動休咎  
頓殊朕祇若

昊天敬慕

皇考翼翼小心夙夜罔有懈怠因得仰邀

皇考昭察默顧

蒼穹錫茲福慶朕惟慮前此之受貺無因且恐將來之承庥不易朝乾夕惕益深謹凜特命虔告

景陵以申忱悃專遣大臣致祭

河神以彰靈應至升殿受賀沿襲頌美之虛文朕所不取是以堅却不允而廣推

皇考錫嘏弘仁施恩中外羣臣有專職者咸晉一階諄諭周詳共加敬勉爰允廷臣所請勒石以紀夫天一生水實為天地之氣所流通而河稱四瀆之宗上應雲漢

澄潔安流用昭嘉瑞

天和協應必有自來詩曰文王陟降在帝左右蓋言文王與天同德而子孫蒙其福澤也我

皇考配

天之靈於昭在上眷顧啓迪至深且厚朕祇承瑞應恐懼悚惶嘉與羣臣增修實政書曰昭受上帝天其申命用休又曰先王奉若天道君臣上下之間無忘戒儆朕亦惟是嚴恭寅畏不遑康寧庶幾求無負於上天

皇考錫予嘉祥之至意濡毫紀實鐫勒貞珉用抒朕祇敬之誠永自儆勗云爾

北鎮廟碑文

國家敬共明神虔修秩望岳鎮海瀆之祀罔不祇肅醫巫閼山實為北鎮近接興京翊衛關輔曩者皇考御書扁額以展褒崇復遣官修飭廟貌

御製碑文光昭奕代典至盛矣康熙五十九年朕奉皇考命恭謁



祖陵於興京道經山麓躬詣展禮瞻仰祠廟蠲潔致禱  
因捐貲庀工載加整葺嗣是雨暘時若禾黍有秋遼左  
黎元咸沾嘉貺洎朕臨御之初復遣專官董司營治棟  
宇榱桷丹雘一新雍正四年冬厥工告成朕惟茲山表  
自虞書載在周禮蓋自天地開闢以來靈秀之所萃聚  
越數千年神應彰顯而我

祖宗發祥闕左豐岐重地王氣所鍾惟

神實為擁護永奠鴻基靈蹟頻昭朕懷允愜展敬之念

夙夜加虔

神其宏敷蕃祉益顯豐功俾方輿之內四序順成百穀  
登遂風雨慶其調和民物樂其康阜洪禧默贊歲事豐  
穰慰兆庶依庇之心以稱朕愛育羣生肅奉

靈祇之意式鑄琬琰用昭示於億萬斯年

善因寺碑文

洪惟我

皇考聖祖仁皇帝恩被九有威加八紘曩歲厄魯特噶

爾丹跳梁朔漠擾亂喀爾喀諸部喀爾喀七旗數十萬  
衆懷德慕義稽首內附

皇考躬率六軍遠行天討

駐蹕多倫諾爾之地受喀爾喀諸部君長朝謁錫之封  
爵為我屏垣既剪兇渠蕩定朔漠撫安藩服允從諸部  
所請爰於斯地創建彙宗寺俾大喇嘛章嘉胡圖克圖  
居之章嘉胡圖克圖道行高超證最上果博通經品克  
臻其與有大名於西域諸部蒙古咸所尊仰今其後身

秉質靈異符驗顯然且其教法流行徒衆日廣朕特行  
遣官發帑金十萬兩於彙宗寺之西南里許復建寺宇  
賜額曰善因俾章嘉胡圖克圖呼畢爾汗主持茲寺集  
會喇嘛講習經典廣行妙法蒙古汗王貝勒貝子公台  
吉等俱同為檀越主人前身後身敬信無二自必率其  
部衆聽從誨導胥登善域稽古聖王之治天下因其教  
不易其俗使人易知易從此朕續承  
先志護持黃教之意也況此地為我

皇考駐蹕之所靈蹟斯存惟茲兩寺當與漠野山川並  
垂無極諸部蒙古台吉屬下永遠崇奉歡喜信受薰烝  
道化以享我國家億萬年太平之福朕深有望焉

廣寧門外石道碑文

周禮地官小司徒令野修道遂師巡其道修秋官野廬  
氏掌達國道路至於四畿禮月令季春之月命司空循  
行國邑周視原野修利隄防道達溝瀆開通道路毋有  
障塞是知古先聖王經國理民之方纖悉備具至於道

途之間咸所加意焉京師為四方會歸萬國朝宗之地  
我國家幅員廣大文軌所同廓於無外梯山航海者聯  
鑣接軫絡繹而交馳廣寧門其必由之路門外通達輪  
蹄所踐歲月滋久漸至深窪時雨既降潦水滯注則行  
旅經涉淹蹇泥淖之中朕甚憫之乃命奉宸苑相度修治  
自廣寧門至小井村長一千五百丈皆填窪為高砌以  
巨石其廣二丈九費戶部帑金八萬兩工既竣司役之  
臣請紀其事朕宵衣旰食勤求治理凡可以濟人利物

者惟恐智慮之未周而施行之不力念茲國門之外輻輳之衢稽於經籍王政所重宜以時修治且期堅固永久使仕宦商旅車馬往來胥由於蕩平正直之路朕心慰焉爰濡筆而紀之詩曰周道如砥其直如矢以是達之天下庶幾經國理民之方莫不備舉云爾

朝陽門至通州石道碑文

自朝陽門至通州四十里為國東門孔道凡正供輸將匪頒詔楮由通州達京師者悉遵是路潞河為萬國朝

宗之地四海九州歲致百貨千檣萬艘輻輳雲集商賈  
行旅梯山航海而至者車轂織絡相望於道蓋倉庾之  
都會而水陸之衝達也雖平治之令以時舉行而輪蹄  
經涉歲月滋久地勢漸窪又時雨既降積雪初融之後漚  
注泥淖有一車之蹶需數十人之力以資牽挽者矣朕  
心軫念爰命所司相度鳩工起窪為高建修石路計長  
五千五百八十八丈有奇寬二丈兩傍土道各寬一丈  
五尺長亦如之其由通州新城舊城至各倉門及東西



沿河兩道亦皆建修石路共計長一千五十餘丈廣一丈二尺及一丈五尺不等費帑金三十四萬三千四百八十四兩有奇經始於雍正七年八月至雍正八年五月告竣有司請為文以紀其事嘗稽周禮地官司徒令野修道遂師巡其道修鄭鏐疏曰道路以通往來之途使賓至如歸亦修文德以來遠人之意禮月令季春之月命司空循行國邑周視原野開通道路毋有障塞典籍所垂凡體國經野之政至備具也朕臨御以來詳求

治理早夜孜孜惟恐不逮近而郊圻遠而郡邑即遐陬僻壤之區其有關於利濟民物者莫不因地制宜以次修舉是役也遠師古聖王之良法美意而斟酌久遠一勞永逸良用欣慰庶使遵是路者瞻周道之蕩平正直咸慶同軌之盛治焉爰誌其歲月而勒諸石云

浙江海神廟碑文

國家虔修祀典以承上下神祇嶽瀆海鎮之神秩祀惟謹視前代為加隆朕臨御以來夙夜以敬

天勤民為念明神之受職於

天而功德被於生民者昭格薦歆敬禮尤至其為民禦  
大灾捍大患合於祭法所載則尊崇廟貌以昭德報功  
蓋所以遂斯民瞻仰之願而動其敬畏祇肅之心使無  
敢慢易為非以得永荷明神之嘉貺意至遠也皇輿東  
南際大海而浙江海寧居瀕海之衝龕山赭山列峙其  
南颶風怒濤潮汐震蕩縣治去海不數百步資石塘以  
為捍蔽雍正二年潮湧堤潰有司以聞朕立遣大臣察

視修築且念小民居恒罔知敬畏慢神褻天召灾有自  
爰切諭以修省感應之道令所司家諭戶曉警覺衆庶  
比年以來徼

明神庥祐塘工完固長瀾不驚民樂其生閭井蕃息越  
七年秋汎盛長幾至泛溢吏民震恐已而風息波恬隄  
防無恙遠近歡呼相慶謂惟

大海之神昭靈默佑惠我蒸黎以克濟此朕念滄海含  
納百川際天無極功用盛大神實司之海寧為海壖劇

邑障衛吳越諸大郡海潮內溢則昏墊斥鹵咸有可虞  
神之禦患捍災莫此為大特發內帑白金十萬兩勅督  
臣李衛度地鳩工建立

海神之廟以崇報享經始於雍正八年春三月泊雍正  
九年冬十有一月告成門廡整秩殿宇深嚴丹雘輝煌  
宏壯鉅麗時展明禋典禮斯稱爰允督臣之請勒文穹  
碑垂示久遠俾斯民欣悚瞻誦共喻朕欽崇

天道祇迓

神庥懷保兆民之至意相與嚮道遷善服教畏神則  
神明之日監在茲顧荅歆饗其炳靈協順保護羣生奠  
安疆宇與造物相為終始有永勿替朕實嘉賴焉

闕帝廟後殿崇祀三代碑文

自古賢聖名臣各以功德食於其土其載在祀典由京  
師達於天下郡邑有司歲時以禮致祭者社稷山川而  
外惟

先師孔子及

闕聖大帝為然

孔子祀天下學宮而

闕帝廟食徧薄海內外其地自通都大邑下至山陬海  
澨村墟窮僻之壤其人自貞臣賢士仰德誦義之徒下  
至愚夫愚婦兒童走卒之微賤所在崇飾廟貌奔走祈  
禳敬畏瞻依凜然若有所見蓋

孔子以聖

闕帝以神神之陟降上下顯赫鑒觀以警動覺悟保佑

扶持與斯人呼吸相應答者感而通微而著洋洋乎忠  
義正直之氣充塞乎宇宙之間與日月星辰同其明江  
河山岳同其體風雷雨露同其功用宜其英靈之振古  
常新而為歷代賢豪所莫能並也本朝崇奉典禮綦隆  
我

世祖章皇帝順治九年勅封

神為忠義神武關聖大帝較往代封號尤尊且正京師  
白馬關帝廟為奉



神之所歲遣大臣將事惟謹朕續緒膺圖尊隆秩祀登極之初既加封

先師五代以展尊師重道至意更念

神福國庇民禦灾捍患英風冠古浩氣不磨生有自來鍾靈孔厚宜追封三代晉爵上公爰允禮臣之議加封神曾祖光昭公祖裕昌公父成忠公博稽史冊名諱弗傳特用闕疑以彰敬慎虔製木主於雍正五年六月供奉後殿春秋崇祀著為令典夫禮繇義起而善則稱先

事神事人理無二致

神威靈赫濯昭灼於千萬世則

神之先人享明禋崇美報歷千萬世而勿替以稱國家  
昭事

明神之盛典禮制攸宜至宏遠也是用勒文貞石紀奉  
祀所始以貽示來茲俾有考焉

世宗憲皇帝御製文集卷十五

欽定四庫全書薈要卷一萬三千一百九十四

集部

世宗憲皇帝御製文集卷十六

碑文

修建闕里聖廟碑文

朕惟

上帝垂佑蒸民篤生

至聖先師孔子以仁義道德啟迪萬世之心而三綱  
以正五倫以明後之繼天御宇兼君師之任者有所則

倣以敷政立教企及乎唐虞三代之隆大矣哉聖人之  
道其為福於羣黎也甚溥而為益於帝王也更宏宜乎  
尊崇之典與天地同其悠久也曲阜廟庭為

孔子里宅毓聖鍾靈之地神爽式憑廟貌崇闋由周而  
來久且加盛我

皇考聖祖仁皇帝德符元化悟徹性天自義農堯舜禹  
湯文武周公之道集成於

孔子者一一體於身心宣為政治聖統在上應運而承

康熙甲子東巡狩

臨幸闕里謁奠廟林殷禮隆儀漢唐莫及朕恭膺丕緒  
志切羹牆即位之初加封

先師五代王爵詣雍釋菜題額歌詩佩德報功之願夙  
夜罔釋於懷雍正二年闕里聖廟不戒於火有司奏告  
朕悚惕靡寧詣廟致祭旋發帑興修命大臣專董厥役  
殿廡規模悉準宮闕製器備物亦令繪圖呈式裁酌協  
宜數年來諄諭執事臣寮經營周至纖毫無憾始愜朕

東七年冬有司具奏大成殿上梁前二日慶雲見於曲阜合詞稱瑞朕以天人感應理固不爽而誠敬微忱詎能邀

上帝

先師之垂鑒用是祇將祀事倍增試額俾普天率土被聖人之德化者同心感慶庶足以廣教澤而答嘉庥而撫躬警勉恒朝夕凜凜焉朕嘗謂帝王之尊聖尊其道也尊其道貴行其道居行道之位而能擴充光大達之

政今修齊治平得其要紀綱法度合其宜禮樂文章備其盛舉凡聖道之未行於當時者悉行於後世雖去聖久遠而心源相接不啻親授於一堂之上默證於千載之前如是欽崇褒顯悉由於中心之誠服而治化日盛聖道斯尊且夫聖人之道一天道也天以牖民之責屬之聖人刪定贊修代天宣教彛倫敦敘禮法彰明後之帝王奉其道以治世師承罔斁資益良多然則尊天尊聖理原合一今茲之崇禮



至聖正所以欽若

昊天而於修建廟庭之重典有不至誠至敬者哉朕勤求上理宵旰孜孜冀以仰述

皇考之鴻謨丕揚

先師之厚澤爰敬推上天篤生聖人與聖人承天立教垂憲奕世之意勒文碑石以昭示臣民於無極而系以辭曰

天心覺世聖治承天治法道法聖聖相傳三五之隆以

道致治峻德弘昭豐功遠被聞知續統

至聖挺生中天復旦文教昌明經緯三才陶融萬象體  
具中和功侔參兩表揚六籍程式五常如會滄海若揭  
秋陽惟我

皇考聰明睿智苞蘊圖書滙宗洙泗德與聖合禮為道  
宗升堂容肅過里恩隆緒績朕躬勤圖紹述至訓煌煌  
箴銘宥密維皇建極惟聖時中古今雖邈心理攸同作  
帝王師與天地配開闢一人神靈如在奕奕新廟輝映

尼防金絲在御車服盈堂煥乎天文五雲示慶錫祐者  
天承庥者

聖敢云瑞應鑒厥微誠普祈洪貺永福編氓文治光華  
日星晶麗木鐸揚聲垂億萬世

和碩怡賢親王碑文

朕惟國家啟昌隆之運則誕降名臣祖宗鍾福慶之貽  
則篤生賢胄粵若師師虞代稷契為帝室之英濟濟周  
朝旦奭是姬宗之彥莫不紀諸謨典頌以聲詩前績可

稽遺編具在如朕弟怡賢親王則於古有光者也王秉  
乾坤之清淑萃川嶽之精華爰自幼年早徵至行禁庭  
奉

誨循禮度以持躬內殿承

歡篤孝思於繞膝實超出於同氣久默識於中懷是以  
黼紹之初慎選親賢之寄特加恩命晉授王封正在亮  
陰俾膺總理當良好奸之雜處以鎮靜服羣情遇綱紀之  
待釐以精明襄萬務成勞既著眷倚逾殷綜中外之討

謨司兵農之大計而王恪勤匪懈兢勵彌深體朕心為  
己心視國事如家事詳核度支之積實府藏充盈請蠲  
吳越之浮糧閭閻康阜興田功於畿內秔稻連疇籌水  
利於江南河渠順軌至若邊形指掌瞭大勢於川原武  
略在胸贊成謀於帷幄壯戎容於鴈磧組練鮮明裕軍  
實於龍沙驂騑騰躍蒼黔恬樂罔聞徵發之煩朝省安  
閒莫見運籌之迹是其潛思默算備竭精誠故能應變  
投機不形聲色者矣扶持正直公道於以昭彰薦達猷

為人材由茲奮起度惟謙挹同事務協於和衷量本寬  
洪曹官胥歸於涵茹領周廬之環衛訓練維勤定官府  
之規模施為悉當凡關於民生吏治知無不言曾經其  
熟計深圖言皆有效祇慎而不宣於衆退謙而恐居其  
名皆中禁之密陳豈外廷之能曉心迹則青天白日衮  
影無慚節操則瑩玉清冰垢塵不染研幾窮理得聖經  
賢傳之精微輔世寧民具帝佐王臣之蘊負道光竹帛  
恢平章調燮之勲瑞叶星雲樹喜起明良之範朕實賴

王治安寰寓王實為朕翊贊昇平既歷八年有如一日  
斯乃

上天降祐

烈祖垂庥賚良弼於本支作盛時之梁棟於

皇考為孝子於朕躬為純臣自昔罕倫在今幸覲惠慈  
之性宜其克享遐年豈弟之恩足以迓承繁祉人情胥  
願天數難齊詎盡瘁以忘軀遂抱疴之纏體禱神祇而  
靡應商醫藥而弗瘳王忠愛之忱始終一致沈綿之候

遷避而弗敢上聞危篤之期溘逝而慮傷永訣朕將臨

視王已飄升望幻影於雲中靈竒示象蛻色身於塵界

慧覺超凡生有由來理當可信王幽明感德遠近歸仁

錫命每申則日晴紫陌祖筵方徹則風靄青阡虔叩總

帷動舉朝之痛憶兢隨素紼溢長路之悲號嘗賜標題

略傳梗概忠敬而兼之誠直勤慎而益以廉明禮重易

名約一言而該美善義隆加諡冠八字以示寵褒朕親

奠郊垵頒紆車駕時陳牲醴每遣臣僚敦儉素之風瑩



兆本由於自擇議推崇之典經費優給於官供吉兆既  
安豐碑宜勒於戲念股肱之誼重雕刻金鏤倦手足之  
情深鋪揚玉牒功高德茂享亘古之鴻聲生榮死哀備  
生人之全福將使斯文炳煥偕星曜以流輝貞石嵯峨  
與峯巒而並峙云爾

惠濟廟碑文

永定河古所稱桑乾河出太原經馬邑合鴈雲諸水奔  
注畿南發源既高匯流甚衆厥性激湍數徙善潰康熙

三十七年我

皇考聖祖仁皇帝親臨指授疏導之方新河既渚遂慶  
安瀾爰錫嘉名永昭底定立廟蘆溝橋北題額建碑奎  
文炳耀河神之封實自此始朕纘紹鴻基加意河務設  
官發帑深籌䟽築之宜比年以來永定河安流順軌無  
衝蕩之虞民居樂業歲獲有秋豈惟人事之克修實賴  
神功之贊佑念石景山據河上游捍禦宜亟爰命相擇  
善地作新廟以妥神朕弟和碩怡賢親王躬往營度得

地龐村之西鼎建斯廟長河西遶而南縈峰嶺北紆而左驚控制形勝負山臨流殿宇崇嚴規制宏敞護以佛閣界以繚垣經始於雍正七年冬逾一年役竣復以蘆溝神廟

皇考聖蹟所在載加崇飾丹雘維新並增建傑閣翼如煥如稱朕敬神惠民之意爰賜廟名曰惠濟勒文貞珉以紀其事詩稱懷柔百神及河喬嶽河之有神備載祀典况永定為畿輔之名川靈應夙著田疇廬舍繡錯郊

圻其得安耕鑿而樂盈寧者胥仰荷

皇考方畧之昭垂而

明神顯靈默相孚佑蒸黎邀福孔多宜加崇敬今茲十  
里內廟貌相望虔修秩祀尚其妥侑歆饗俾斯民康阜  
乂安以弘我國家無疆之慶豈惟朕承茲惠貺我  
皇考平成之駿烈實嘉賴焉

惠遠廟碑文

我國家受

天眷命撫御寰瀛先被四表莫不尊親

太宗文皇帝崇德七年班禪額爾德尼達賴喇嘛知東土有

聖人遣使通款路涉萬里時經數載始達

盛京逮

世祖章皇帝時遂親至京師朝覲備蒙

恩眷後以策妄阿喇布坦肆惡逞奸殘蹂西藏

皇考聖祖仁皇帝特遣大師計日平定撫綏人衆各復

生業賜今胡畢爾漢冊印封號安置禪榻重興黃教用  
以慰番衆皈依佛法之誠並酬班禪達賴喇嘛累世恭  
順之悃也朕御極以來加意護持俾安淨土因思古今  
之有佛教特以勸善懲惡濟人覺世為本黃教之傳所  
以推廣佛經之旨也演教之地愈多則佛法之流布愈  
廣而番衆之嚮善者益衆西藏既有班禪額爾德尼而  
近邊之番衆離藏遼遠皆有皈依佛法之心惟茲川省  
打箭爐之外有地曰噶達昔年達賴喇嘛曾駐錫於此

爰相度川原創建廟宇發帑金數十萬兩遣官董司工役依西方白賴本佛廟之圖式凡為殿堂樓房一千餘間又為平房四百間賜額曰惠遠丹雘輝煌麗用充備置兵以衛之達賴喇嘛來登禪榻率諸徒衆咸就新居諸番耆幼踴躍忻喜使臣奏言彼土早寒自造寺以來氣候和暖深秋未凍則知茲寺之建神人胥慶山川著靈朕所以仰體

皇考厚酬達賴喇嘛累世恭順之忱且以廣布黃教宣

講經典使番彝道俗崇法慕義億萬斯年永躋仁壽之  
域則於佐助王化實有裨益是用紀文豐碑以昭永久  
遠焉

河源神廟碑文

四瀆之中河為大自星宿發源經行數千里而入中國  
亘絡坤維澤潤九宇方望之祭三代以來尚矣我國家  
敬共明神欽崇祀事精禋昭格靈貺丕彰南北隄工安  
瀾底績漕艘利濟輸輓以時以至引河自汕於中泓沮



如悉淤為沃壤澄清千里經歷三旬上瑞光昭鴻庥屢  
著究豫江淮之境各建廟宇春秋展祀尊崇今典視前  
代為加虔顧河源所自廟貌闕焉於禮未稱朕念崑崙  
遠在荒徼命使不能時至而禹貢有導河積石之文考  
其地在今西寧河州境內黃河流入中國自此始則建  
廟以祀河源之神實惟茲地為宜迺命禮官詳議敕甘  
肅撫臣於河州相度善地恭建新廟高門廣殿肅穆闕  
深發帑鳩工專官董役雍正九年冬十月告成朕親灑

宸翰賜額曰福祐安瀾先是諭旨甫頒經營伊始雍正八年六月之望河州有慶雲捧日之瑞自午至申萬衆瞻仰七月五日臨洮道臣相地積石關外見河流澄澈上下百有餘里徹底瑩潔凡三晝夜同時入告共慶祥符朕惟河嶽山川均為造化之功用而潤澤廣遠利賴溥被惟河最靈

河神之福國祐民歷有明驗今茲立廟之地顯著休徵益以知

天心降鑒感則必通神德昭明誠無不格爰誌建廟歲  
月揭諸貞珉兼紀

明神顯應之蹟垂示永久以昭朕夙夜懋勉恭承  
天眷敬迓

神庥之至意云

祐寧寺碑文

西寧郭隆寺地處通途喇嘛之自西藏來者於茲取道  
為邊陲古刹自羅卜藏丹津之叛結連奸頑喇嘛煽惑

番彝一時蠢動是以大兵進討燒焚寺宇俾奸宄無所  
藏匿凶徒既殄邊境敕寧梵刹舊基理宜修復爰發帑  
鳩工遣官往董其事山門佛殿規制秩然僧舍經堂一  
準舊式限令延僧二百人常住薰修宣揚妙法往來梵  
衆亦得棲息之所役既告竣以舊稱不雅勅定嘉名賜  
額曰祐寧寺並紀文勒石以詔久遠夫黃教之傳盛於  
西域凡厥部衆尊崇信奉遠邇一心其為道蓋佛氏之  
支流開示迷途因俗利導於治化不為無助書曰惠迪

吉從逆凶惟影響覽茲寺廢興之由順逆之理昭然矣  
我國家弘敷德澤以振興黃教綏撫番彝繼自今其恪  
守清規虔修梵行諸部落皈依崇奉之願久且益堅將  
見鴻慈普佑永戴清寧茲寺與西土山川同其悠久可  
也

廣惠寺碑文

黃教之興盛於西土其道根源天竺演說因果覺悟羣  
生使為善者知勸作惡者思懲與作善降祥作不善降

殃之理默相符會所以易俗移風裨助於王化為益弘  
矣西寧舊有郭莽寺地處通途為邊方古刹從西藏進  
口之喇嘛皆於茲托足即佛家所謂十方院也自羅卜  
藏丹津悖義作逆茲寺奸頑喇嘛相與連結煽動部落  
遂使修行之區轉為藏奸之藪是以大兵進討除其衆  
而燬其寺所以鉏惡止亂非得已也邇來氛翳廓清疆  
土寧謐宜振興黃教以綏撫番彝爰發帑金遣官往為  
重建佛殿經堂僧舍山門規模復舊丹雘一新常住之

僧以二百人為限俾其宣揚妙法且使往來僧衆有所棲憩董役之臣請易嘉名賜額曰廣惠寺所望重建之後遐邇番彝一心信奉敦崇善行以延慶祐永享我國家億萬載太平之樂是朕錫福蒸民躋諸仁壽之意也紀文勒石用昭示於久遠焉

太上清宮碑文

天師張道陵漢時煉丹成道得神授秘文祓除陰慝通靈變化享壽百二十有三子孫世嗣其法所傳經錄符

章印劍代以一人典之弟子法官轉相師授其教以忠  
孝正直感動神明安善驅邪佑民護國君臣父子倫敘  
秩然閱數十傳神應如響是以歷朝重之世襲真人之  
封於今勿替貴溪龍虎山者天師煉形修丹之地玄壇  
丹竈在焉後即其地建上清宮唐宋元明以來代有修  
建我朝康熙二十六年

聖祖仁皇帝親灑宸翰賜號碧城並頒太上清宮扁額  
錫帑金以修葺殿宇歷年已久宜事鼎新朕特發內帑



專遣廷臣前往重修增飾廟貌又以斗為帝車羣生之所托命復令相方卜址創建斗殿以為祈禳善地萃工庀材百堵偕作宏敞堅固煥如翼如經始於雍正九年五月明年七月工竣復賜田三千四百餘畝以永為世業夫天師以忠孝為道法之宗自東漢迄今千五百年法裔相仍克修緒業効忠闡教捍患除災蓋其精誠所感實足以通貫幽明知鬼神之情狀故能常垂宇宙裨益聖功福國濟人功驗昭著太上清宮為神祇之所陟

降法錄之所憑依福地仙都山靈擁護增新崇構典禮  
攸宜是用紀事述文勒諸貞珉以昭示永久俾知國家  
酬庸報功弘獎忠孝之至意云爾

世宗憲皇帝御製文集卷十六

欽定四庫全書薈要卷一萬三千一百九十五

集部

世宗憲皇帝御製文集卷十七

碑文

高家堰碑文

黃河為運道民生所關而治河以導淮刷沙為要高家  
堰者所以束全淮之水并力北趨以入河河得清淮則  
沙不積而流益暢故考河道於東南以高堰為淮黃之  
關鍵淮自中州挾汝潁渦汴諸水匯注於洪澤一湖蕩

激滯洄浩渺無際而淮揚兩大郡居其下流惟恃堰堤  
以為障禦所繫詎不重哉我

皇考聖祖仁皇帝為億兆蒼生籌萬世永賴之計屢勤  
清蹕指示臣工方畧昭垂神謨卓越全河形勢經畫周  
詳而高堰堤工尤厪

睿慮迄今數十年來河臣遵守成規列郡得安衽席者  
皇考聖績神功之所賜也朕紹承鴻緒注念河防思高  
家堰隄工綿遠保護維艱惟不惜多費帑金全建石工

使高厚堅固久遠可恃斯於運道民生實有裨益朕衷  
默定詢度僉同爰特發帑金庀材鳩役專命大臣董其  
事經始於雍正八年二月越雍正十年六月大工告竣  
仰藉

神庥風濤恬靜薪石雲集工作易施增卑而高培薄而  
厚易圯而新孔固孔完其增廣皆有加於舊凡六千三  
百四十餘文延袤四十餘里所費帑金一百一萬餘兩  
於是高堰之工屹然為淮揚巨障河臣上言大工之成

不可無紀用俞所請撰文勒石以示朕宵旰疇咨之至  
意冀河流濟運永慶安瀾保障無虞民生樂業以無忝  
皇考底定平成之績云爾

拈花寺碑文

昔我

世祖章皇帝萬幾餘暇留神內典其時法門龍象受知  
最深者曰王琳琇國師嘗欲令其徒苾芻溪森主席京師  
宣揚道法眷顧之意至厚朕閱王琳苾芻溪語錄歎其高

風卓識超冠叢林因為頒諭表章追封賜祭以仰承  
世祖皇帝優崇正梵之至意既又念直省刹寺碁布開  
堂秉拂者日衆而禪宗愈衰是以再三誥誡俾各勤求  
本分直透向上一關仍擇宗門法侶具正知正見者為  
之表率倡導焉京師內城西北隅有護國報恩千佛寺  
者創自前明歷百有六十載琳宮頽敝鐘鼓寂寥爰命  
重加修整經始於雍正十一年正月本年九月告成梵  
宮禪宇煥儼輝煌堪為大衆熏修叅學之所因擇琇國



師下法嗣名超善者命主方丈錫寺額曰拈花揭之山  
門粵自世尊以正法眼藏涅槃妙心實相無相微妙法  
門囑付摩訶迦葉迨香至來茲震旦提唱宗乘為不立  
文字教外之別傳迄今數千年靈山一會儼然未散鬢  
陀優鉢徧滿寰區日月星辰山河大地人民六畜城郭  
市廛有情無情即色非色處處是拈花道場法會刻刻  
是拈花時節因緣物物是如來手中之花塵塵剎剎有  
調御丈夫人天師宛爾拈出但須本分衲僧瞥然薦取

便續從上以來諸祖心燈如或未能則叅須真叅悟須  
實悟三藏十二分千七百則公案不出此二字字中有  
大海潮音嘈啗啗震諸人耳根字中有大摩尼珠晃  
朗照耀奪諸人眼識蓋執指忘月便是二鐵圍山見月  
忘指便是曹溪一滴也居此寺者尚其證琇國師之所  
證入此大圓覺海步步踏得正修行處不負世尊當日  
拈花示衆與

世祖皇帝護持佛法深恩以為直省刹寺倡朕有厚望

焉

賢良祠碑文

朕惟國家鍾昌隆之運誕降賢臣宇宙成熙皞之風端  
資良弼故徽聲聿播旂常銘勒於生前而元祀攸崇俎  
豆歆承於身後用以寵褒已往勸勵方來所由沛殊恩  
舉曠典也爾和碩怡賢親王忠孝自天敬勤成性嘉猷  
入告啟乃心以沃朕心庶績咸熙圖國事即如已事勲  
高變理立臣道之儀型禮極哀榮備人生之祉福爾大

學士公圖海等際王迹肇基之始業贊運籌當皇朝一  
統之期績參佐命我

皇考聖祖仁皇帝繇膺厯祚簡公卿以翊昇平載定寰  
瀛選將帥而宣威武中朝外任多令名清節之完人跨  
海窮邊著破敵開疆之偉畧朕眷懷舊德詢訪僉謀既  
祠宇之告成敘官階而列位於戲念鴻功於同氣自古  
希倫追盛烈於羣賢於今不泯綸章丕錫永垂圖牒之  
輝珉石深鐫式煥星雲之色凡百有位其咸觀感於茲

昭忠寺碑文

朕惟疆場用命因敵愾以効忠行陣爭先值臨危而殉  
節追尋壯槩殊切軫懷載建豐碑用光崇祀爾和碩敬  
謹親王尼堪等賦姿雄毅秉性堅貞均際會於從龍各  
圖功於汗馬我國家蕩平區寓命上將以專征綏靖邊  
陲張王師而撻伐戈鋌所向旋見廓清貔虎前驅一惟  
奮勇或氣凌勁寇縱橫萬衆之中或志銳先登出入重  
圍之內王公將帥既赴義以如歸裨校卒徒亦銜恩而

自矢勵致身之素志蹈刃何辭耿報國之丹誠嬰鋒不  
顧芳名常著摛文宜付於史官英爽猶生勤事允符於  
祀典乃者構成棟宇羅設几筵考厥官資定其位次握  
麾擁節並盱蠻於一堂環甲荷戈得從班於兩廡懸之  
巨榜表厥忠勲錫以綸章昭茲節烈於戲華楹敞朗長  
迴日月之輝雕琰嵯峨永壯風雲之色聿傳久遠式載  
寵榮

普陀山普濟寺碑文

普陀洛伽山為觀音大士示現之地歷徵靈應自梁貞明中始立佛寺宋元以來代加修葺我

皇考聖祖仁皇帝巡幸浙西遣官興建殿宇上為

皇太后祝禧

御題賜額勒文豐碑以紀其事山靈擁護聖績丕昭朕  
續紹鴻基於茲十載念茲山為古聖道場重以

聖祖仁皇帝宸翰留貽尤宜敬謹崇奉爰特發帑金重  
加修飾專官往董其役經始於雍正九年九月雍正十

一年六月告成朕惟天下名山大川皆扶輿清淑之氣  
磅礴而融結普陀秀峙海堦迴立於天風紫濤浩泝無  
際之中尤靈秀所萃聚宜其為仙真之所栖息況大士  
以慈悲濟物為心隨聲赴感無所往而不在其示現在  
一時實無時而不示現神通感應不可思議即示現與  
不示現舉可不論也夫佛法廣大無邊大海包涵無際  
億萬百千里不足以測海之廣而一勺未嘗非海也億  
萬百千法不足以盡佛之相而一法無適非佛也今以



大海視普陀一拳石耳而菩薩現像之場善衆皈依之地  
泛慈航於彼岸結寶筏於迷津證普度之慈緣顯弘  
深之願力珠宮在望香界重新寧不與鷲峯鹿苑均為  
淨域之名區也歟用為斯記鐫諸翠珉以志靈山之勝  
槩

普陀山法雨寺碑文

法雨寺者普陀山大士之別院也

皇考聖祖仁皇帝既修建普濟寺上為

慈聖祝禧復念茲寺為海氛所震蕩發帑重新俾僧徒  
得所栖止

賜額立碑增輝瀛嶠歷今已數十載宜加崇飾朕特遣  
專官賁內帑庀材鳩工不勞民力香林梵宇丹雘煥然  
與普濟寺大工同時告竣督臣請摛文勒石以紀夫大  
士以慈緣普濟度盡衆生為願朕嘗繹法雨之義謂濟  
物之普遍者莫如雨當夫慈雲布護甘露滂沱高下遠  
近一時霑足凌霄聳壑之喬柯勾萌甲坼之微卉華葩

果蓏無不濡被潤澤發榮滋長暢茂條達各遂其性而不自知假使物物而雨之朝朝而溉之將不勝其勤而終不足以徧給惟本大慈悲現大神力周遍一切在在具足所謂天降時雨山川出雲膚寸而合不崇朝而遍乎天下者濟物之功莫大於是神山寶刹縉侶雲集自當有被時雨之化證心印而傳法乳普利生之實用以不負大士隨緣接引之慈恩而副朕弘振宗風護持正覺之至意者朕深有望焉

宗恩寺碑文

宗恩寺在江南荆溪之磬山故明天隱修禪師演法道  
場也禪師與密雲悟同得法於龍池幻有傳具正知正  
見以本分事接人不墮語言窠臼其著述單提直指洞  
本通微得從上之正傳於禪宗實有裨益漢月藏悖負  
本師恣其狂臆用知解心設穿鑿法一時毒霧紛迷教  
外別傳之旨幾晦密雲悟憫其誑世惑人大聲疾呼一  
闢再闢而禪師同心應和復為釋疑普說以斥其謬當

時之人眼目不具莫辨金鍤然雖一時未能遽掃霧霾而辨異闢邪之卓見護持正印之苦心洵可稱盲俗之金鏡法門之大匠也禪師一傳為玉琳琇國師再傳為卽溪森禪師竝蒙

皇祖世祖章皇帝恩遇顧問提唱宗乘不墜家風向非禪師眼目淨正法乳純真後代兒孫能若是傑出乎朕間披閱琇森父子語錄並知其淵源所自有不可誣者寺在磬山去縣三十餘里舊制湫隘不足容叅學徒衆

爰命擴舊易新增葺殿宇經始於雍正十一年越明年  
二月告成有司請勒碑以紀緣起朕念義興山水靈秀  
古德高人時所棲託自龍池導源天童磬山皆生其地  
相繼建大法幢震大法雷以開示正法眼藏甚勤且力  
斯寺之建豈無紹祖燈續佛慧擔荷大事無忝前修者  
勃興其間乎若徒以增輝梵剎崇飾講堂為山門標榜  
不肯真參實悟則辜負朕恩與魔外所見無異是昔者  
乃祖磬山之所深訶也念之哉

報恩寺碑文

古德有云行解相應謂之為祖又云明道者多行道者少可知心性邊事固貴眼明必須踐履行不應解定非真解明而不行豈是真明昔人十二時中並無雜用心處又謂數十年始得打成一片皆為此也朕於玉琳琇國師蓋不勝仰止之歎焉國師紹法磬山年始二十有四即開堂於吳興之報恩寺提唱宗乘惟以本分事激發學者其自勵四誓與答客問七諦當因課誦示眾語

自為為人悉皆如實具足無一虛字舞弄狂機疑悞後  
學實叅實悟真修真行我

世祖章皇帝慕其名德延入內廷對

御敷陳無非道要朕嘗擬於黃帝之訪崆峒成湯之問  
隨光惟

皇祖究竟真宗故能得此大士而國師實能無忝

恩遇始終無一言一行世諦流布與本分間隔洵不謬  
為佛祖兒孫人天眼目者矣朕既選其語錄刊布叢林



復念報恩法席宜加修整爰命有司庀材增葺以昭我  
皇祖尊崇有道相得益彰之盛軌抑茲寺也磬山修先  
嘗演法而玉琳琇繼之所謂白雲千頃老屋數間一榻  
高眠今土木瓦石為大衆轉大法輪者磬山之家風也  
合諸檀越建大禪堂十方聚會應時及節為大衆說法  
者玉琳之行履也今磬山玉琳皆已入大般若涅槃而  
白雲如故木石依然法堂之鐘鼓重開十方之善信不  
少大衆入此門來還見種種轉大法輪相否還聞時節

說法無量音聲否如果親見親聞則報恩法會儼然未  
散只在本人當下領取以毋負國師常住切實為人處  
是所望於努力修持者

十方普覺寺碑文

西山壽安有唐時古刹以宰堵波為門泉石清幽層巖  
夾峙乃入山第一勝境寺在唐名兜率後曰昭孝曰洪  
慶曰永安實一寺也中有旃檀香佛像二其一相傳唐  
貞觀中造其一則後人範銅為之皆作偃臥相橫安寶

琳俗稱臥佛見於紀載詩歌者屢矣歲久頽圯朕弟和碩怡賢親王以無相悉檀庀工修建嗣王弘暎弘曉繼之捨貲葺治於是琳宮梵宇丹雘煥然遂為西山蘭若之冠工既竣命無闕永覺禪師超盛往主法席夫象教之設所以顯示真宗佛身充滿於法界普現一切羣生前隨緣赴感靡不周而恒處此菩提座是以造像多為五色蓮臺結跏趺座而茲獨示臥相者其義何居善見毘婆沙律釋佛遊王舍會城謂遊有四一者行二者住

三者坐四者臥以是四法名之曰遊然則監窮三際橫  
亘十方惟一真心泯絕對待應緣現迹任物成名凡此  
四威儀邊在三摩鉢地如玉鏡之交照似寶珠之五  
色非同非異非即非離居斯常寂光中便是毘盧頂上  
今者石泉流於舍下木葉飄於巖間非王舍衛城行法  
遊乎塔鈴少選而聲銷檐角無風而動息非王舍衛城  
住法遊乎行者住者如是坐者臥者同然矣夫虛空無  
相不拒諸相發揮法性無身匪礙諸身顯見果能不起

有情無情之妄想不生心內心外之邪思將一法纔通  
萬像悉歸心地千途並會光明遍滿恒沙此七寶牀上  
古佛現前丈六金身蓋覆大地占斷三際不往不來豈  
非一佛臥遊十方普覺歟因名之曰十方普覺寺而勒  
是語於碑並記朕弟和碩怡賢親王修寺緣起以示來  
者

紫陽道院碑文

性命無二途仙佛無二道求長生而不知無生執有身

而不知無相法身如以箭射空力盡還墮非無上至真  
之妙道也道祖云外其身而身存豈非世尊無我而有  
我之旨乎又云觀空亦空空無所空所空既無無無亦  
無無無既無湛然常寂夫此湛然常寂豈非常樂我淨  
之妙諦乎彼夫滯殼迷封癡狂外走者烏能測知萬一  
哉大慈圓通禪仙紫陽真人張平叔著悟真篇發明金  
丹之要自序以為是乃修生之術黃老順其所欲漸次  
導之至於無為妙覺達摩六祖最上一乘之旨則至妙

至微卒難了徹故編為外集形諸歌頌俟根性猛利之士因言自悟於戲若真人者可謂佛仙一貫者矣紫陽生於台州城中有紫陽樓乃其故居去郡城六十里有百步溪傳為紫陽仙化處又嘗焚修於桐柏崇道觀歲久香火岑寂特命發帑遣官載加整葺夫以真人靈源朗徹決定無生三界十方隨心轉用何有於蟬蛻之鄉更何有於塵棲之迹特以朕景仰高蹤表其宅里俾學道之士人人知此向上一路千途同軌非可強分區別

自主障礙庶幾真人揀迷覺世之新傳不泯於後也自  
紫陽樓迄百步溪崇道觀三處各為殿堂門廡若干楹  
併置田若干畝以資香火有餘則以贍其後裔雍正十  
二年二月經理告竣爰誌其緣起而刻諸石

天竺寺碑文

浙中多名山古寺天竺乃昭著之大刹也湖山明秀勝  
地鍾靈觀音大士歷徵顯應竒木妙相舍利瑞光普現  
弘慈久而彌彰有感必通如響斯捷



皇考聖祖仁皇帝巡幸浙西重新香界

御製碑文照耀穹宇為

慈聖祝釐為蒼生祈福意至厚也祝融不戒宜事鼎新  
爰因總督李衛之請命發帑金載加修葺雍正十二年  
十一月工竣璇題朱網丹雘煥如遠近人民瞻仰歡悅  
用勒文翠珉以紀其事夫佛法廣大無邊不可思議而  
大士慈悲為念隨聲赴應普濟羣生是以善信皈依有  
求輒應然天人感召之理無他曰誠敬而已矣當其誠

心懇至雖以愚夫愚婦之微賤而冥漠之際呼吸相通  
如其不然即有靈明響應悲憫救護之聖心亦不能強  
迷頑者而施之惠澤故曰神無常享享於克誠又曰至  
誠而不動者未之有也不誠未有能動者也夫斯人生  
享太平之福日用飲食一絲一粟在在皆天地覆載之  
恩即在在皆明神庇祐之力使非時存敬信之心好善  
遠罪以迓福祥而獨於祈禱迫切之時奔走膜拜冀邀  
鑒格則誠意微薄豈能感應尚安望休祥之敷錫乎是

以大士之慈悲靈聖振古如茲而斯人之昭受神庥必  
由自致誠能虔敬居心實力嚮善湔除惡念廣種福緣  
則善氣和會感致繁禧大士慈恩降祥錫祉年豐物阜  
風雨以時衍蕃昌而躋仁壽朕愛養黎元之至意其深  
慰矣夫

世宗憲皇帝御製文集卷十七



總校官庶吉士

臣

張能照

校對官檢討

臣

王福清

謄錄監生

臣

孔廣枚

謄錄監生

臣

宣葆光

欽定四庫全書

會要  
集部

世宗憲皇帝御製文集卷十八至  
二十二

詳校官原任編修巨徐立綱


欽定四庫全書薈要卷一萬三千一百九十六

集部

世宗憲皇帝御製文集卷十八

祭文

歷代帝王廟祭文

上帝降衷下民惟后綏猷繼天立極大統肇開於

三古丕基遞嬗於累朝崇祀帝王廟者凡二十有一君  
厥惟舊矣我

皇考大行皇帝一中允執兩大兼叅彙治功道量之全

極武烈文謨之盛俗盡躋于上理情彌軫乎前光定諸  
史之公評抒千秋之卓識謂興王創業既多戡定鴻勲  
即今辟守文不乏綏和美化歷年多寡不必同符致治  
淺深原難一轍履至尊而制六合聯寰宇以為一家萬  
方共戴尊親億兆胥依父母即當奕世維新之治追念  
勝朝式廓之疆曾經食土踐毛尚有先疇舊德豈得以  
拘儒苛論妄絜短長更難以稗乘剽聞恣憑褒貶  
特頒明諭遍採羣言亘登溥薦於

百王榛穢永光夫萬禩亦有熊羆之士宣力旂常不無  
鼎鼎之臣勞心輔弼股肱一體生前獲荷天休廊廡列  
筵身後仍陪廟享於戲彝章隆重仰惟志事以虔遵至  
治馨香尚冀

神靈之默佑式孚冥漠庶克居歆

追封孔子五代告祭文

道尊往聖宜錫類以推恩牒溯前徽乃緣情而制禮絲  
綸聿賁俎豆維新仰惟



先師孔子撰合乾坤名高日月纂修刪定煥六籍之文  
明祖述憲章樹百王之儀範朕夙承

庭訓嚮往實深誕紹丕基欽崇彌切惟德全而業盛知  
積厚而流光爰命廷臣式稽譜系詒謀式穀洵篤慶於  
一門毓秀鍾靈宜上追於五代並躋祀典特晉王封體  
皇考敬師之心弘

先聖顯親之孝於戲金聲玉振集今古之大成木本水  
源享烝嘗之美報靈其不昧尚克來歆

文廟增定從祀告祭文

道宗前聖尊萬世之師資緒啟後賢備千秋之祀典虔  
將蘋藻聿告几筵仰惟

先師孔子德配乾坤心傳堯舜文垂六籍揭大義以昭  
明教設四科育英才而蔚盛雖微言漸遠難窺達天盡  
性之功而正脈相承不乏入室升堂之彥朕紹登寶位  
親詣辟雍爰因釋奠之時更切崇儒之念特頒諭旨博  
訪廷臣考自有周逮於昭代凡在傳經之哲咸躋從祀

之班茲卜良辰以林放等二十六人新造牌位安奉兩  
廡以張載之父張迪新造牌位安奉崇聖祠於戲闡揚  
經術長歆俎豆之馨廣厲學宮益篤美牆之慕伏惟  
聖鑒格享苾芬

闕里告祭文

仰惟

先師孔子道高千古業著六經集聖學之大成樹人倫  
之標準朕紹承丕緒仰止

師模糊譜系以追封入成均而釋奠不謂杏壇之地忽  
生回祿之災雖

像位幸存而棟楹俱燼具聞奏報實切兢惶豈成毀有  
時竟莫爭於定數恐尊崇未至祇難釋於中懷即遣所  
司協同大吏飭工材而備豫占時日以經營將式煥夫  
宮牆期重新於丹雘辟雍伊邇已親詣以昭虔闕里云  
遙用專官而展祭慰安靈爽瞻望格歆謹告

# 太學文廟祭文

金聲玉振集神聖之大成霞蔚雲蒸表天人之上瑞肅  
將蘋藻奉告几筵仰惟

先師孔子德邁皇王學該河洛綜五百年之傳緒聿竣  
宮牆立億萬代之師模永光俎豆自廟堂之重建導宮  
殿之鴻規盡誠敬以經營務尊崇其制度乃者將升畫  
棟選卜良辰忽覩卿雲光輝晴晝芝英爛熳映泗水以  
霏烟車蓋輪囷倚尼岡而結影當前期之二日有開必  
先瞻垂象者三時惟形則著絢於東國顯徵丹雘之祥

耀彼南方弘闡文明之運

上帝之凝庥滋至

先師之降鑒孔昭實感慶於衷懷用吉蠲而躬詣於戲  
羹牆如見彌殷重道之忱霄漢為章佑啟作人之化  
神其如在歆享苾芬謹告

先師孔子誕辰告祭文

金聲玉振開宇宙之文明月角珠庭垂聖神之儀範肅  
敷筵几聿薦藻蘋仰惟

先師孔子學綜圖疇統承堯舜道超萬類喻海河泰岳  
之崇深德服羣賢比江漢秋陽之皎潔溫良恭讓之度  
邦國共欽齊莊中正之容簡編備載新營廟貌虔製俎  
樽竭誠敬之心思極尊嚴之規制乃者歲逢庚戌序屬  
仲秋上朔周朝近當今日推之長厯即尼山降誕之時  
卜以良辰是闕里增輝之會用稽徽典適協貞符於戲  
棟宇恢闔已慶雲霞之紉縵堂楹端儼重瞻日月之光  
華

神鑒孔昭必芬歆享

聖廟告成祭文

達天盡性樹萬世之師模重道尊經煥千秋之廟貌肅  
將嘉祀用告成功仰惟

先師孔子得聖之時由天所縱纂修刪定啟宇宙之文  
明祖述憲章綜帝王之統緒升堂入室洪施樂育之恩  
學禮誦詩永作義方之桀比高懸之日月亘古莫踰喻  
出類之鳳麟生民未有朕奉遺編而欽企儀典務極其



推崇循舊址而鼎新經營必盡其誠敬頒於國帑董以  
大臣每繪式以先呈乃按圖而指授榱桷栝柏求大木  
於名山簠簋樽壺選良工於內府晶熒黃瓦準制度于  
宸居璀璨玉圭儼威容於

聖座懸標題之巨榜洒翰親書建屹峙之豐碑搞文恭  
紀工程累歲時深嚴恪之心棟宇宏規蓋備觀瞻之美  
華棟雕柱增輝講道之壇璆磬金鏞重振大成之殿數  
仞之宮牆逾峻兩楹之俎豆虔陳特遣皇五子弘晝等

親詣几筵敬行祭告於戲卿雲糾縵已開丹雘之祥古  
檜貞堅佇望青蒼之色惟祈鑒格式享苾馨

日月合璧五星聯珠告祭

景陵文

聖德流光貽嘉祥於奕世

天文垂象煥精采於重霄紀史籍以揚芬陳几筵而告  
慶欽惟

皇考聖祖仁皇帝道邁義軒功叅覆載秉至明以照物

日月齊輝凝庶績以宜民星辰就敘心通歷數稽密度  
於渾儀化協陰陽驗休徵於洪範山陬海澨無非樂利  
之區災嶠朔陸盡是協和之氣延

亨蒼之眷佑觀辰次之昭回乃者候屆仲春日當初吉  
二曜同躔而璧合五星聚舍以珠聯營室應清廟之占  
姬訾號乾宮之位自歷元而後曾聞顓頊之時由世紀  
所書直比陶唐之代歷四千餘年之久遠再見星占追  
六十一載之皞熙用彰

天錫仰惟

先烈實為鍾慶之餘逮及眇躬幸值迓庥之始當累傳  
之寶祚景命彌隆合萬國之歡心鴻名益耀於戲貞符  
上瑞式勤昭事之忱

峻德豐功長切祇承之念伏祈

慈鑒俯賜格歆謹告

景陵懸圃告祭文

陵園蔥鬱森警衛於百神

殿宇深嚴肅精禋於億禩因標題而展敬告筵几以申  
忱欽惟

皇考聖祖仁皇帝學貫圖疇道高軒頊日新盛德恒惕  
念於萬幾天縱多能復游情於六藝趨庭而仰觀

聖蹟時荷

親傳伸紙而恭倣

宸章特承

睿獎乃者因山啟隧已占靈淑之徵巨榜豐碑宜極尊

崇之制濡毫灑墨庶誠敬之潛通澄慮凝神儼

音容之如對虔題

徽號冀揚疇昔之耿光聿頌

隆恩莫寫平生之孺慕手追心企長懷

寶翰之煙雲倣見愾聞遙感橋山之霜露謹告

黃河澄清告祭

景陵文

瑞應光昭荷垂庥之慶澤嘉徵迭告顯默佑之鴻慈望

園寢以抒誠薦馨香而伸悃欽惟

皇考聖祖仁皇帝道濟羣生恩濡萬國豐功巍煥慶海  
宇之清寧至治恬熙溥寰區之樂利播六十一載之深  
仁厚澤德化旁流緜億千萬世之景祚洪禧太和翔洽  
緬

神靈之陟降尤

福庇之深長嘉貺頻仍珍符屢見乃者黃河效順碧浪  
澄清由陝州而至桃源地連五省自嘉平而逾獻歲時

閱三旬臣民共慶其難逢史籍曾稱其罕覩俯慚冲眇  
實切悚惶深惟昭事之小心敢懈祇承之素志顧此數  
年之治理詎能篤迓純庥或因一念之恪誠幸得仰邀  
慈眷顧

昊天而錫福致大地之呈祥鑒已往之勤虔勵將來之  
兢業寵綏有自感激難窮祇薦牲牢肅陳筵几於戲溯  
神謨之底定

方畧昭垂揚



駿烈於懷柔苞苴炳耀伏惟

聖鑒俯賜格歆

北鎮廟祭文

惟

神名著禮經位均方嶽峙興京之重地擁衛畿東炳福  
國之明靈庇安遼左朕昔奉謁

陵之命曾申詣廟之虔瞻望層楹遂捐資而營葺紹承  
寶位復發帑以增修煥丹雘其如新鐫青珉而紀事溯

工程之肇啟閱歲序之屢更十雨五風協休徵於泰運  
萬箱億庾占瑞應於豐年神貺昭彰朕心感慶遣專官  
以將事陳牲醴而薦馨所冀巒岫鬱葱奠鴻基之鞏固  
郊原膺厚贄和氣以蕃昌惟爾

明神尚其歆鑒

追封關帝三代祭文

秉兩間之正氣毓聖有基冠五等之宗班恩推及遠絲  
綸誕賁譜牒增輝惟公隴右家聲音中族望慶餘積善

垂矩矱於高門祥裕詒謀溯淵源於奕葉啟後昆之忠  
義大節炳於日星景先世之風規今範昭於弓冶宜加  
錫命用示褒揚爰詔禮臣特隆封典建上公於三世宗  
報祀乎千秋於戲緬厚德以流光克昌厥後凜英風而  
佐化有開必先表曠代之芳型聲明禋之盛舉尚其歆  
格鑒此殊榮

關帝告祭文

敦大倫而表範忠冠古今追先世之詒謀禮崇祖考式

頒茂典用展精裡緬惟

關帝素志忠誠天姿勇毅九霄皎日長懸翼戴之心萬  
古英風不泯勁剛之氣學宗洙泗生平誦習春秋光動  
河山義烈昭垂宇宙仰靈威之赫濯無間於走卒兒童  
薦俎豆之馨香且遍於遐陬僻壤高明完節既長耀於  
史編福國庇人久特隆於廟祀念神奇之所自信積累  
之有基爰命廷臣聿稽門緒千秋華胄美三葉之芳規  
五等崇班錫上公之顯號於戲義堅事主躬正直以炳

靈孝重顯親溯本源而褒贈

神其歆格鑒此告虔

清和宣惠風伯之神祭文

惟

神象著箕星德符巽卦動而致雨聿彰地上之功靜不  
揚波爰表澤中之瑞考典章於祠部方展精禋覽奏疏  
於河臣宜崇封號眷惟淮甸瞻廟宇之舊存念此洪湖  
賴隄防而永固氣調清籟經時協應律之占響息商飈

歷載奏安瀾之慶喜

天和之潛感荷

神貺之昭靈是用特封為

清和宣惠風伯之神并命河臣虔陳牲醴所冀導揚元  
化順四序以節宣佑保蒸民護百川而奠定尚其鑒格  
歆享苾芬

世宗憲皇帝御製文集卷十八

欽定四庫全書薈要卷一萬三千一百九十七

集部

世宗憲皇帝御製文集卷十九

祭文

都城隍廟祭文

靈爽丕昭作皇都之保障規模增煥肅廟貌之觀瞻爰  
告成功聿修祀典惟

神拱衛金湯憑依畿甸錫嘉祥於民物應感無私默呵  
護乎邦家明威有赫歲時久崇夫祈報殿廡方待於繕



修朕敬禮

明神虔新祠宇發金錢於內府命董理於大臣烏革翬  
飛掩映雲霞之彩虹梁虬柱輝煌金碧之觀妥侑是宜  
明禋式舉於戲聰明正直固萬雉於金甌寒燠雨暘調  
四時於玉燭

神其昭鑒來饗苾芬

運河神祭文

國家輓運全藉漕渠河水暢流最需雨澤惟

神功能佑國惠足庇民愷澤所敷兆人攸賴乃者春夏之交愆陽間告朕深懷憫惻夙夜省躬維緣河一帶愆雨澤之施以致水淺運艱人勞舟滯揆厥所由朕心甚疚或係去年運阻之日曾施挑濬之功畚插所加有傷地脉或係地方官吏歲時奉祀不誠或係在運官丁隱痛不聞致違戾陰陽之節凡諸譴告罪在朕躬是用齋心省過遣官致祭

神其鑒此肫誠蘇我黎庶念七州之飛輓速溥雷雨之

慈達百萬之天庾大霈油雲之澤俾河水暢流全漕利濟尚其降格歆此明禋

黃河神祭文

惟

神源通星漢派衍崑崙四瀆稱宗九州滋潤惠澤廣遠  
靈應夙彰頃者決口合龍民居攸奠既奏安瀾之績旋  
呈清泚之祥里計二千時經旬月錫福固由於

天眷效靈實顯夫

神功用遣專官虔修祀典惟冀光昭庥佑永慶阜安延  
景福於萬年溥純禧於兆姓尚其歆格鑒此精誠

河神祭文

朕注心河務禮敬

明神歷歲以來休徵屢著若蘭陽之引河自汕儀封之  
深渠忽開允賴

神功豈闕人事惟今年黃河之伏汎具覩安恬而季夏  
山左之南陬偶生暴漲入駱湖而驟溢望洪澤以奔趨

踰越長隄散瀾廣陌河臣撫臣雖心力之交勵懼功績之難施乃或畚鍤未加而沙淤已見或芟薪甫下而水勢遽消至如宿虹彭家堡者當灣溜之頂衝本歲修之險要加以漫開百丈洶湧倍常忽焉水徑歸於中泓波自迴於北向延袤而出堆為遙擁之灘直暢以流形類斜挑之壩不獨塞一時之暫決抑且省每歲之增修萬夫共歎為奇逢四野爭傳夫異瑞三旬之內早奏安瀾無糜費於金錢匪淹遲於日月糧艘復循其道來隴未

失其時不作而成豈經營所能就不期而致豈謀慮所  
及知斯實

穹昊垂庥

明神贊佑式昭符應深慰朕懷特遣河臣虔修祀事聿  
申謝悃惟

神鑒歆彌顯光靈永庇助我國家平成之慶

河神祭文

惟

神功昭四瀆德冠羣靈澤國蒙庥新祠在望乃者洪湖  
積水沮洳全消惟茲淮甸輿區平原相接長阡廣陌增  
二萬頃之良疇東作西成貽億兆人之恒產

天庥滋至靈貺孔彰特命河臣遣官致祭冀弘開於樂  
利用永奏於昇平惟爾

明神尚其歆鑒

河源神祭文

惟

神象應漢津源䟽崑閬滙百泉而出地燦列繁星經九  
曲以安流遙趨大海績成底定瑞現澄清茲惟湖淀之  
新淤喜覩河濱之沃衍乘天時而收地力盈二萬頃之  
膏腴裕國計而富民生垂千百年之美利感

帝心之仁愛念

神貺之昭彰特遣專官虔修祀典所冀榮光照燭協世  
運之貞符慶澤綿延成寰區之永賴

神其鑒格享此苾芬



河神祭文

惟

神靈發崑崙源通星宿啓圖書之上瑞四瀆稱宗邁蒲  
穀之崇封百川咸納功弘潤物滋大地以成能利願通  
漕裕天儲以足用朕自御極以來肇舉明禋屢蒙

神貺波恬浪靜澄清上徹乎榮光闢土便民沮洳悉呈  
夫沃壤至於安瀾循軌隄防按候以興工不日成功章  
奏合詞而告竣永綿亘於三千餘里普美利於億萬斯

年惟茲政務之咸修實荷

神靈之默佑是用虔將祀事報荅鴻庥特遣河臣肅申  
謝悃所冀金隄永固著嘉績於平成茂典長膺慶洪流  
之底定尚其歆格鑒此苾芬

清口河神祭文

惟

神源開星宿派導龍門因澤國之蒙庥建特祠而崇祀  
粵從今歲聞水勢以厯懷爰命河臣殫心思而經理乃

者泝流千里歷汎候以恬波漕運萬艘循長隄而安輓  
帆檣載路既國計之攸充禾黍連疇復民生之有慶喜  
蒙靈貺顯著休徵聿遣所司親行祀事所冀南趨淮浦  
會雙瀆以俱澄東注海壖納百川而永奠  
神其昭鑒來享苾芬

武陟縣河神祭文

惟

神澤滋坤壤象應天津恒福國以昭靈用庇民而垂佑

自豫州而過東土遍地安瀾從春半以逮秋中經時順軌乃若儀封北岸濬深渠而迅浪通流蘭邑南隄汕引河而中泓直瀉表瑞三旬之內助靈兩縣之區畚鍤未施工程已固荷

明神之默相感嘉貺之疊彰特命河臣虔修祭典所冀奠茲巨瀆永觀底定之功惠我蒸黎溥被平成之慶神其鑒格歆此苾馨

永定河神廟告成祭文

朕注心河務禮敬

神明遠籌捍禦之宜備舉尊崇之典惟永定河源從山  
右古號桑乾經馬邑以奔趨湍波易激歷畿南而漫衍  
暴漲難馴顯佑於

皇考之時肇祀於蘆溝之北既隆封典爰錫嘉名靈貺  
孔昭鴻庥協應朕思石景實處上游宜建廟以安

神命河臣而度地岡巒擁衛控金隄而制洪流棟宇輝  
煌駐雲旗而迴巨浪肅將祀事祇告落成惟

神鑒歆永垂庇佑安瀾奏績俾廬井之恬熙潤下成能  
享春秋之祈報謹告

奉安石景山永定河神像祭文

惟

神源濬天池派分焉邑漚鴈雲之衆水為畿甸之洪流  
睿謨指授於當年嘉名肇錫靈貺昭彰於歷歲祀典虔  
修朕纘紹鴻基留心河務喜經流之順軌允賴

神庥相石景之上游載營廟貌輝煌丹雘庶幾靈爽之

式憑蠲潔牲醪特命崇官而祇薦洒翰而題巨榜製文  
以勒豐碑備舉隆儀用酬嘉貺

神其體茲忱悃惠我蒸黎隄岸無虞喜澄波之永奠田  
廬有賴樂繡壤之常豐謹告

清口河神祭文

朕軫念民生廑懷河務虔修祀典敬禮

明神數載以來屢蒙嘉佑惟東南之澤國當邳宿之要  
區湖泊瀾連每戒風濤之險淮黃交滙時深漲溢之虞

聿自今秋時逢汎候洪波萬派循軌道以安流巨浪千  
層繞長堤而順下畚鍤先時而增築共保堅完帆檣載  
路以輓輸允資利涉歲事有京坻之慶居民登衽席之  
安斯皆仰荷鴻庥顯承靈貺封章來告感慰實深特命  
河臣載稽典禮明禋敬展用申報享之精誠

神爽式憑尚冀鑒歆而來格永孚默相弘贊平成尚饗  
浙江海神祭文

明神受職於



天恩覃澤國禦災捍患利賴宏深凡茲東南黎庶所得  
保室家而安耕鑿者

神之賜也朕恭膺

天命撫御寰區夙夜敬共以承上下神祇之祀所期海  
宇蒼生永蒙庇佑惟茲浙西郡邑實為瀕海要衝比年  
以來仰荷

神靈嘉貺頻昭安瀾共慶迺者風潮鼓盪衝潰隄防近  
逼民居吏人震恐朕痼瘼在念軫惻維殷適遣重臣周

行相度涓日鳩工為海疆圖久遠奠安之計用是潔誠  
致禱虔命在工大臣敬展祀事昭告悃忱惟

明神俯念海壖億萬生靈城郭田廬於茲託命隄工木  
石皆出脂膏力役所需民衆勞苦伏冀洪昭福佑默相  
大工綏靜百靈風恬波息俾功作得施長隄孔固克底  
厥績衛護蒸民保聚生全安享樂利則東南列郡溥被  
庥祥朕實拜  
明神之功德於無疆矣謹告

河源神祭文

惟

神源從天漢澤潤坤輿溯禹迹於當年時營廟貌顯  
神功於歷歲默佑生靈惟甘陝之巖疆實邊陲之重地  
乃者和風甘雨協應以時下隰高原豐登有慶閭井樂  
恬熙之俗蒼黎享仁壽之休靈貺孔昭朕心嘉慰用展  
馨香之薦虔申報謝之典不盡之忱統祈

神鑒尚饗

河神祭文

朕心殷河務敬禮

明神歷載以來屢蒙庥應惟是睢寧之境正當河道之衝向因北岸之沙淤橫激中泓之巨浪難施疏濬竅屬險工乃至今年欣瞻上瑞時惟伏汎自汕引河順水勢以東趨暢流無阻刷遙灘而直下化險為平大溜通行闢延袤之正軌新沙旋擁護綿亘之長隄人力不勞河防永固朕懷慰愜感慶實深凡斯嘉貺之弘昭允賴

神功之默相是用虔申謝悃祇薦芩芬仰冀明靈彌徵  
顯佑俾茲南土永慶安瀾

祈雨祭風神文

朕奉

天子民刻刻以雨暘時若為念乃今春三月膏雨愆期  
恒風示儆朕心懷悚惕瞻仰焦勞思過省愆誠勉臣庶  
伏念節宣和氣

神實專司夙彰福國之功宜切勤民之隱是用潔蠲齋

被昭告悃忱仰冀

明神默垂孚佑風威斂息澍雨均霑用觀百穀之成大  
慰三農之望竭誠籲禱惟

神鑒之謹告

太歲壇諸神祈雨祝文

朕承

眷命撫御蒸黎宵旰孜孜勤求民瘼乃者時當仲夏雨  
澤愆期旱暵可虞焦勞倍切齋居省過惶悚靡寧諄諭

臣工實心修省方殷籲禱幸沐甘霖仰惟

天鑒之垂慈實賴

神功之默相載抒誠悃虔展精禋伏冀膏澤覃敷雨暘  
時若溥洽三農之慶用觀百穀之成謹告

世宗憲皇帝御製文集卷十九